

deremus. Secus si fit, intellectum nostrum assimilari pro-
stibulo patiemur, cujus Spem deperditè atque insuper ri-
diculè frustrantur Amasii pro coronatis aut imperialibus
plumbeos & cupreos nummos solventes; ita & intellectus
noster susque deque habita Figurarum Syllogisticarum na-
turâ falsum pro vero, non ens pro ente, vel proprio erro-
re, vel Sophistarum fraude seductus apprehendet.

§. II. Dicitur Syllogismus *Quarta Figura Galenicus*,
quia *Averroes* (homo quidem sine fide, teste *Mendoza* dis-
put. log. 10, Sect. 20. §. 110.) in comment. ad cap. 12. lib. 5. pri-
or. analyt. ejus originem *Galeno cuidam* attribuit. Quinam
autem fuerit iste *Galenus*, non uno inter authores vivitur
voto. *Johannes Ammonius*, cognomine *Scotus*, teste *Lo-
rino* in cap. 8. lib. 1. prior. analyt. quest. 2. vult esse Arabem
quendam, qui duos libros de demonstratione conscripsit.
Communis tamen & maximè teceptissima sententia est,
Averroem per istum *Galenum* intellexisse Medicorum
Principem & Antesignanum, Virum in arte logica versa-
tissimum; quanquam in operibus *Galeni*, quæ ad nostra
pervenerunt secula, *Dd. Conimbric. 1. prior. analyt. cap. 7.*
quest. 1. art. 1. fatentibus, nulla hujus figuræ facta fuerit
mentio, in aliis tamen libris, qui nunc desiderantur, &
quos *Averroes* legit, mentionem ejus facere potuit, ut
verba mutuemur *Zabarella de quarta figura Syllog. cap. 1.* Po-
sito jam, Authorem hujus quartæ figuræ fuisse *Galenum*
Medicum, per hoc, quod eam rejiceremus, debitam reve-
rentiam huic viro optimo non denegaremus, quippe qui
communi eruditorum applausu Logices ope universam
Medicinam, judice *Coo* in epist. ad *Democrit.*; & *Aphor. 1.*
Sect. 1. amplissimam omni ex parte locupletavit, proque
ejus integritate adversus Sophistas tum temporis tam ma-
sculè propugnavit, ut præclarum ejus ingenium omni-